



Sesida dals

Communitgà ils

Protocol nr.

25 d'avrigl 2023

26 d'avrigl 2023

340/2023

Dumonda Bardill

concernent la promoziun da la cultura

Resposta da la Regenza

Cun la revisiun da la Lescha davart la promoziun da la cultura (LPC) ha il Cussegl grond concludì d'elavurar in concept cumplexiv per promover la cultura (CPC). Il CPC per la perioda 2021–2024 è vegnì redigì en il rom d'in vast process participativ en cooperaziun cun la Cumissiun da cultura sco er cun numerusas organisaziuns culturalas e liadas a la cultura. La LPC inclusiv ordinaziun, la Lescha da finanzas, il Reglament per pajar contribuziuns or da la finanziaziun speziala «Lottaria naziunala» sco er il CPC èn liants per la promoziun chantunala da la cultura. L'orientaziun strategica sa drizza tenor ils accents da promoziun, tenor las finamiras e tenor las mesiras ch'èn definids en il CPC. Il CPC infurmescha detagliadamain davart ils instruments da promoziun e davart las cundiziuns generalas. Ina da las incumbensas centralas da l'Uffizi da cultura (UdC) è quella d'examinar, sche las dumondas da promoziun correspundan a las prescripziuns. Displaschaivlamain è il CPC entrà en vigur durant la pandemia da COVID, che ha chaschunà blera lavur e gronds custs supplementars nunspetgads per la promoziun da la cultura (prescripziuns da la Confederaziun, elavuraziun da 362 dumondas d'indemnisaziun da perditas, projects da transfurmaziun e.u.v. en la dimensiun da ca. 11 miu. francs). Las acturas ed ils acturs dal sector da la cultura, ch'èn stads pertutgads fermamain da la pandemia, han beneventà ed onurà ils sforzs dal UdC. Ultra da quai è il UdC stà confruntà cun absenzas da personal pervia da maternità e da malsogna. Durant questa perioda han singulas dumondas duvrà dapli temp per vegnir elavuradas. Cun engaschar svelt collavuraturas e collavuratur temporars e cun augmentar ils pensums da lavur ha il UdC pudì liquidar la chargia da lavur. Tuttina è il UdC sa stentà d'accelerar la realisaziun dal CPC tenor plan. Uschia ha il UdC fatg cunvegnas da prestaziun cun 41 instituziuns culturalas, concedì 54 contribuziuns a projects ed elavurà in concept per la promoziun dal film. Plinavant ha el contactà las persunas responsablas per il svilup regional sco er l'Uffizi per economia e turissem cun l'intent d'evaluar il potenzial da sinergia. En il rom dal Program da la Regenza 2021–2024 vegn actualmain elavurada ina plattafurma da

cultura. Quella vegn er a cuntegnair in chalender d'occurrentzas. Uschia vegn cuntanschida in'ulteriura finamira dal CPC.

Tar la dumonda 1: In augment da las plazzas per 50 % è vegnì realisà tras adattaziuns internas. En cas da basegn po il UdC plinavant quintar er en il futur cun il sustegn da collavuraturas e collavuratur temporas. In'extensiun da las resursas da persunal vegn examinada.

Tar la dumonda 2 a.: Ina incumbensa centrala dal UdC è quella da controllar che las prescripziuns e las reglas legalas vegnian observadas. Uschia vegni procurà per trasparenza e per egualità da las schanzas en la promoziun da la cultura. Quai na stat betg en cuntradiziun cun l'orientaziun a la promoziun.

Tar la dumonda 2 b.: Tenor l'art. 9 al. 3 LPC na sustegna il chantun «betg projects u instituziuns culturalas che lavuran en emprima lingia cun finamiras da rendita». Garanzias da deficit per contribuziuns a projects garanteschon quai. En cas da garanzias da deficit or dals meds da la lottaria naziunala pon fin dus terzs da l'import concedì vegnir pajads anticipadamain, quai per pussibilitar la liquidità. En cas da cunvegnas da prestaziun e da contribuziuns a projects or da las finanzas publicas generalas vegnan pajaments parzials prestads, sche las prestaziuns èn vegnidadas furnidas ed èn cumprovadas (art. 51 al. 2 da l'Ordinaziun da finanzas). Cun il conclus da la Regenza dals 13 da december 2022 (prot. nr. 983/2022) è il UdC vegnì incaricà en il rom da l'examinaziun da las incumbensas e da las prestaziuns, da realisar la digitalisaziun dal process da contribuziun en il sector da las contribuziuns culturalas. A medem temp stoi vegnir examinà, sche las contribuziuns pon vegnir pauschalisadas pli fitg.

Tar la dumonda 3: Cun la planisaziun dal CPC 2025–2028 èsi vegnì cumenzà l'atun 2022. Durant il 2. quartal 2023 vegnan las acturas ed ils acturs da la cultura interrogads davart il CPC actual. Sin fundament dals resultats vegn il CPC 2025–2028 elavurà en cooperaziun cun la Cumissiun chantunala da cultura sco er cun las instituziuns culturalas. Er ina lavur da publicità vegn planisada. Il CPC vegn previsiblamain sutmess al Cussegl grond en la sessiun d'october 2024 per l'approvaziun.



En num da la Regenza

Il president:

Il chancelier:

Peter Peyer

Daniel Spadin